



Administrativt vedtak

Saksnr	Utval	Møtedato
133/17	Plan og utvikling	

Saksansvarleg: Øi Knut Fredrik

Arkivsaknr.: Arkiv
17/46-22 K1 - 233, K2 - K40,
K3 - &02, K3 - &17 Sakshandsamar
Øi Knut Fredrik, 57641200

Dato
19.06.2017

Tildeling av fellingsløyve hjort og elg - Aurland 2017

Kort samandrag

Målsetjinga for hjortebestanden i Aurland er for planperioden 2015-17 ein vekst på 10%. Avskyting med auka fokus på handyr og kalv/ungdyr, utan at tal dyr felt er auka, gjer at ein vekst truleg er status. Dette vert underbygga av sett-hjort-materialet, sjølv om metoden framleis er «fersk».

I kjølevatnet av CWD-problematikken hjå villrein i Nordfjella, har forutsetjingane for bestandsstorleik endra seg siden bestandsplanen vart vedteke. Mattilsynet og Miljødirektoratet peikar på at hjorteviltbestandane i randsona til Nordfjella bør reduserast med 20-30% for å minska smittepresset frå villrein til anna hjortevilt. Ei auka avskyting av hjort/elg vil også gje fleire prøveresultat som vil vera sentralt for det vidare arbeidet med CWD.

Aurland kommune meinar at avskytinga bør aukast frå 2017 og at målet for i år bør vera ei auke med 30%, til 217 felte hjort. Ny bestandsplan frå 2018 skal implementera hensynet til CWD i målsetjing og verkemiddel.

Årsmøtet i Aurland bestandsplanområde meinar at jaktrettshavarane skal kunna auka avskytinga i 2017 ved å nytta tilgjengelege fellingsløyve frå heile planperioden.

Kommunen jobbar for å få på plass ein moglegheit for mottak (sal) av slakt i bygda, samt hjelp til utflyvning av slakt frå utilgjengelege plassar. Dette som insentiv til auka avskyting.

Vedtak:

Med heimel i Forskrift om forvaltning av hjortevilt, tildesar Aurland kommune følgjande fellingsløyve for 2017:

- 296 fellingsløyve på hjort

- 20 fellingsløyve på elg

Ubrukte fellingsløyve frå planperioden, totalt 165, kan nyttast i 2017 av vald som er medlem i bestandsplanområdet.

Aurland kommune har som mål at fellinga av hjort skal aukast med 30% i 2017, totalt minst 217 hjort.

Tiltaket er vurdert etter Naturmangfoldlova.

Vedlegg:

Ynske om reduksjon av hjortestamma i Aurland grunna CWD

Løyvetildeling Aurland 2017 - vald med bestandsplan

Løyvetildeling Aurland 2017 - vald utan bestandsplan

Elgvald Aurland innfylt 2017

Anbefaling til kommuner om å vurdere bestandsreduksjon av hjortevilt(174669)

Skrantesjuke og reduksjon av hjorteviltbestandene Nordfjella og Selbu

020617(174175)

Aktuelle lover, forskrifter, avtalar m.m.

- Forskrift om forvaltning av hjortevilt – rundskriv (heretter kalla Hjorteviltforskrifta)
- Forskrift om jakt- og fangsttider samt sanking av egg og dun for jaktsesongene fra og med 1. april 2017 til og med 31. mars 2022 (heretter kalla Forskrift om jakttider)
- Naturmangfaldlova

Saksutgreiing

Aurland kommune godkjente i 2015 oppretting av Aurland bestandsplanområde for hjort, og bestandsplan for dette området i perioden 2015-2017. Målet for planperioden var å auka hjortebestanden med 10% i planperioden, etter tilgjengeleg kunnskap. Planen omtala fordeling av fellingane på kjønn og alder, men hadde ikkje målsatt tal på felte dyr. Sett-hjort-materialet, samt det faktum at fellingane dei siste åra har hatt auka fokus på uttak av hanndyr, samt kalv og ungdyr, framfor vaksne dyr, gjer at det er god grunn til å tru at bestanden er i vekst. Milde vintrar med lite snø gjer også at det er grunn til å tru at overlevelsen har vore god.

Etter at bestandsplanen for hjort i Aurland vart vedteken, har forutsetjingane for bestandsstorleik endra seg i kjølevatnet av påvisninga av skrantesjuke på villrein i Nordfjella. I vedlagte brev frå Miljødirektoratet og Mattilsynet, vert det oppmoda om at kommunane kring Nordfjella legg til rette for ein bestandsreduksjon av hjorteviltet. I saneringsplanen for villrein i Nordfjella er bestandsreduksjon i randsona skissert til å vera 20-30%. Styret i Aurland bestandsplanområde har i lag med administrasjonen diskutert situasjonen og kommet fram til ein plan for auka uttak basert på det kunnskapsgrunnlaget me har på aktuelt tidspunkt. Dette har munna ut i vedlagte søknad frå Aurland bestandsplanområde. Hovedmålet er å auka fellinga i 2017 ved å nyta ubrukte fellingsløyve frå planperioden.

Det vert søkt om følgjande:

1. Høve til å nyta alle «ubrukte» fellingsløyve frå planperioden i 2017
2. Høve til at styret omdisponerer løyve for valda, ved å inngå kontrakt med vald med ubrukte løyve. Løyva skal delast ut til dei valda som ønskjer fleir løyve

etter at «ordinær kvote» er brukt. Desse omdisponerte fellingsløyva delast ut som frie dyr.

3. Auka jakttid for elg, frå 1. september til 23. desember.

Vurdering

Situasjonen viltforvaltninga står ovanfor i ljós av skrantesjuka er ekstraordinær. Kommunen som offentleg organ skal etter beste evne søkja å etterleva dei tilrådingar som kjem frå kompetente statlege organ. Signal frå Mattilsynet/Miljødirektoratet er at bestandane av hjortevilt kring Nordfjella skal reduserast med 20-30%. Dette gjer at kommunen lyt strekkja seg langt for å leggja til rette for at jaktrettshavarane skal klara å felle monaleg meir hjort enn ved «normalsituasjonen». Det er lagt opp til ein dialog med Mattilsynet og aktuelle kommunar etter endt jakt 2017 for å laga ein plan for nå ønska bestandsreduksjon. All felt hjort/elg/rådyr over 1,5 år skal prøvetakast for CWD, jamfør pålegg frå Miljødirektoratet. Eit auka uttak vil såleis også bidra til eit auka tal prøvar. Dette er sentralt for å vurdera eventuell førekommst av CWD hjå andre hjorteviltartar enn villrein, og vil difor vera premissleverandør for den videre forvaltninga av både villrein og anna hjortevilt.

Kommunen har som nevnt vore i dialog med styret i bestandsplanområdet for hjort for å søkja identifisera relevante verkemiddel for eit auka uttak frå 2017. Årsmøtet til bestandsplanområdet meinar det er nok fellingsløyve tilgjengeleg for å auka uttaket monaleg. Dette skal gjerast ved at valda (som er medlem – om lag 85% av totalt areal) i praksis skal kunna fella uavgrensa med hjort i 2017 ved at ubrukte fellingsløyve vert omdisponert gjennom privatrettslege avtalar. Rådmannen meinar at det vil vera hensiktsmessig å setja eit mål for fellinga i 2017, slik at ein ved jaktslutt kan vurdera om det er trøng for å forlengja jakttiden, slik som ein til dømes vurderer i Lærdal om ikkje måla vert nådd. Ved å ta utgangspunkt i tala frå Mattilsynet/Miljødirektoratet i Saneringsplan for Villrein, skal bestandane i randsona til Nordfjella reduserast med 20-30 prosent. Rådmannen meinar at det vil vera ei fornuftig utgangspunkt å ha som mål å auka avskytninga i 2017 med 30% i Aurland. Dette vil gje eit uttak på 217 dyr i 2017, 50 fleire felte dyr enn «normalt». Dette burde også vera eit realistisk mål. Til samanlikning auka Årdal bestandsplanområde for hjort avskytninga med 32% frå 2015 til 2016. Mykje tydar på at forekomsten av hjort i Årdal og Aurland har store demografiske likheiter.

Me legg til grunn at ny bestandsplan i Aurland for neste planperiode vil ta inn over seg problemstillinga med skrantesjuka. Vedteken bestandsplan for hjort i Aurland er vurdert etter Naturmangfoldlova, videre er også anbefalingane frå statlege organ vurdert etter denne. Kommunen ser grunn til å leggja ekstra vekt på føre-var-prinsippet i lova (§ 9) i tematikken kring skrantesjuka. Det vil vera sentralt å auka avskytninga av hjort i Aurland frå og med 2017.

1 og 2. Høve til å nytta alle «ubrukte» fellingsløyve frå planperioden i 2017

Hjortviltforskrifta § 16 gir vald med godkjent bestandsplan høve til å overføra fellingsløyve mellom åra i bestandsplanen. I kommentarene (rundskrivet) til forskrifta er dette utdypa. Normalt skal kommunen kunna godta ei flytting av fellingsløyve frå år til år på inntil 10%. Kommunen skal likevel nytta skjønn ved fastsetting av dette.

Situasjonen med skrantesjuke i området er ekstraordinær. Styret i bestandsplanområdet i Aurland meinar at det er sentralt å kunna flytta alle ubrukte fellingsløyva (totalt 165) frå 2015 og 2016 til 2017 for å auka avskytninga. Styret ønskjer dette framfor tildeling av fleire fellingsløyve frå kommunen. Rådmannen ser at moglegheiten til å flytta løyve mellom vald i Aurland allereie er etablert, men at det

framleis er mykje å gå på når det gjeld å flytta løyve mellom år i planperioden. Rådmannen er positiv til at grunneigarsida ønskjer å utnytta denne moglegheitene meir og meinat at dette er god og målretta grunneigarstyring. Bestandsplanområdet står fritt til å laga privatrettslege avtalar om flytting av fellingsløyve mellom vald som er medlem. Bruk av ei slik ordning vil gjera det meir attraktivt å vera medlem, og kan verka som ei gulrot for dei valda som enno ikkje har meldt seg inn.

3. Auka jakttid for elg, frå 1. september til 23. desember.

Endra jakttid vil krevja dispensasjon frå Forskrift om jakttider. Etter forskriftas § 7 er det Miljødirektoratet som har mynde til å dispenserar frå jakttidene. Felles landbrukskontor ÅLA har søkt Miljødirektoratet om at jakttida for elg skal vera lik jakttida for hjort, 1. september til 23. desember. Saka er enno handsama. Det vert informert om utfallet når det er fatta vedtak i saka. Inntil vidare er jakttida for elg 25. september til 23. desember.

Konklusjon

Rådmannen tilrar at Aurland kommune tildelar 296 fellingsløyve for hjort i 2017, med fordeling på kjønn og alder i tråd med vedteken bestandsplan. Rådmannen tilrar at Aurland kommune har som mål at det vert felt 30% fleir hjort i 2017, totalt 217 hjort. Alle ubrukte fellingsløyve frå planperioden (for vald som er medlem i bestandsplanområdet) kan nyttast i 2017.

Rådmannen tilrar at Aurland kommune tildelar 20 fellingsløyve på elg.

Rådmannen tilrar at alle ubrukte fellingsløyve frå planperioden skal kunna nyttast i 2017. Dette vil kun gjelda vald som har signert avtala om medlemskap i bestandsplanområdet. Det er 165 fellingsløyve frå 2015-16, tilhøyrande vald som er medlem, som vil kunna nyttast i jakta 2017. Etter endt jakt denne hausten, er planperioden over og løyva vil ikkje lenger vera gyldige.

Aurland kommune har trekt godkjenninga til Nedberge hjortevald, grunna omtvista rettighetsforhold. Saka ligg til klagehandsaming hjå Fylkesmannen i Sogn og Fjordane. Når vedtak er fatta i saka, tek Aurland kommune stilling til eventuell løyvetildeling til valdet.